

每週經課朗誦經文(巴克禮漢羅/教羅)2014/01/12

共同經課 - 1

以賽亞書四十二章一節～九節

1 看 ah, 我 ê 奴僕, 我所扶持 ê, 我所揀選 ê, 我 ê 心所歡喜 ê, 我有將我 ê 神 hō伊, 伊 beh 將公理傳 hō 外邦。2 伊無喧嘩, 無出聲, 亦無 hō街路裡聽見伊 ê 聲。3 受傷 ê 蘆葦, 伊無 at 折, beh hoa ê 燈火, 伊無 phah 熄; 伊照真實, 將公理傳播。4 伊無清(chhìn)心, 亦無失膽, 直到伊 tī 地上設立公理; 海嶼 lóng thèng 候伊 ê 教示。5 耶和華上帝, 創造 chiah-ê 天來 thī 開伊, 開闊地 kap 伊所出 ê, 用活氣 hō地上 ê 眾百姓, 用神魂 hō行 tī hit 頂面 ê 人 ê, 講, 6 我耶和華用公義召你, beh 牽你 ê 手, 保守你, hō你做百姓 ê 約 ê 中保, 做外邦人 ê 光; 7 來開 chhiⁿ-mī ê 目矙, chhoā 受關 ê 出監; hō tiàm tī 烏暗 ê 出監牢。8 我是耶和華, 這是我 ê 名, 我無將我 ê 榮光歸 hō別 ê 神, 亦無將我 ê 名聲歸 hō雕刻 ê 偶像。9 看 ah, 前 ê 事已經成, taⁿ 我亦 beh 將新 ê 事講明; chiah-ê 事未發起以前, 我就講 hō lín 聽。

共同經課 - 2

詩篇二十九篇

1 大衛 ê 詩。1) 大權能 ê ê kiáⁿ ah, lín tiòh 將榮光氣力歸 hō耶和華, 歸 hō耶和華。2 Tiòh 將耶和華 ê 名所應該得 tiòh ê 榮光歸 hō伊。用聖潔 ê 裝飾敬拜耶和華。3 耶和華 ê 聲 tī 水面; 榮光 ê 上帝起雷; 耶和華 tī choē-choē 水 ê 頂面。4 耶和華 ê 聲有大氣力; 耶和華 ê 聲滿滿威嚴。5 耶和華 ê 聲 phah 折柏香樹; 耶和華 phah 碎黎巴嫩 ê 柏香樹。6 伊亦 hō伊 tiò 跳親像牛 á; Hō 黎巴嫩 kap Se-lián tiò 跳親像野牛 ê kiáⁿ。7 耶和華 ê 聲 hō火燄分叉。8 耶和華 ê 聲振動曠野; 耶和華振動 Ka-te-su ê 曠野。9 耶和華 ê 聲 hō鹿母 kiaⁿ-tiòh, 來生 kiáⁿ; 亦 hō樹林 ê 樹葉 lak 光光; 見若 tī 殿內 ê lóng 講, 榮光。10 大水汨濫 ê 時, 耶和華坐 teh 做王, 耶和華坐 teh 做王, 直到永遠。11 耶和華 beh 賞賜氣力 hō伊 ê 百姓; 耶和華 beh 用平安賜福伊 ê 百姓。

共同經課 - 3

使徒行傳十章三十四節～四十三節

34 彼得開嘴, 講, Taⁿ 我真正知上帝無用外貌取人; 35 獨獨 tī tàk 邦國見有敬畏伊來行義 ê 人, hō伊歡喜接納。36 上帝所寄 hō以色列 kiaⁿ 孫 ê 話, tùi 耶穌基督來傳和平 ê 福音, (伊是萬有 ê 主), 37 chit-ê 消息 lín 知是 tī 約翰所傳 ê 洗禮以後, tùi 加利利起到遍猶太; 38 就是拿撒勒人耶穌, 上帝有怎樣用聖神 kap 才能抹伊; 伊就四界行做好事, 醫好見若魔鬼所壓制 ê; 因為上帝 kap 伊 tī-teh。39 見若伊 tī 猶太人 ê 地方 kap 耶路撒冷所行 ê, 阮做干證; 人就吊伊 tī 柴裡, 來害死伊。40 到第三日, 上帝 hō伊 koh 活, 續出現, 41 m̄是 hō眾百姓看, 是 hō上帝事先所揀選為 tiòh 伊做干證 ê 人看, 就是阮 chiah-ê, tī 伊 tùi 死人中 koh 活 ê 了後 kap 伊 saⁿ-kap lim 食 ê 人。42 伊 koh 命令阮傳 hō百姓, 干證 chit-ê 是上帝所立定做活人死人 ê 審判司。43 眾先知亦為 tiòh 伊做干證, 就是凡若信伊 ê 人, tùi 伊 ê 名得 tiòh 罪赦。

共同經課 - 4

馬太福音三章十三節～十七節

13 Hit 時耶穌 tùi 加利利到約旦, 就近約翰, beh tùi 伊受洗禮。14 若是約翰阻止伊講, 我 háp-kai 對你受洗禮, 你反 tng 就近我 mah? 15 耶穌應伊講, Taⁿ 請允我, 因為咱合宜 tiòh án-ni, 來盡 lóng 總 ê 義。就允伊。16 耶穌已經受洗禮, liám-piⁿ tùi 水上來: 天忽然為 tiòh 伊開, 伊就看見上帝 ê 神, 親像鴿 á 降臨 tī 伊 ê 頂面。17 Koh tùi 天有聲講, chit-ê 是我疼 ê Kiáⁿ, 我所歡喜 ê。